

Empat misi NIMP 2030 pacu transformasi industri Malaysia

RM8.2 bilion disalur rangsang pelaburan, pembabitkan pemain sektor

Oleh Hazwan Mohamad dan Mohd Nasaruddin Parzi
bhnews@bh.com.my

Kuala Lumpur: Kerajaan akan memperuntukkan hampir RM8.2 bilion dalam Pelan Induk Perindustrian Baharu (NIMP) 2030 bagi merangsangkan pelaburan dan pembabitkan industri.

Perdana Menteri, Datuk Seri Anwar Ibrahim, berkata kerajaan komited sepenuhnya untuk menyokong pelaksanaan NIMP 2030.

"Ia dianggarkan memerlukan jumlah pelaburan RM95 bilion sepanjang tujuh tahun (NIMP 2030), terutama dari sektor swasta yang digerakkan daripada ekuiti, modal dan pasaran kewangan swasta.

"Hampir 10 peratus akan diperuntukkan oleh kerajaan untuk membantu merangsang dan memberi insentif kepada pelaburan ini melalui Dana Pembangunan Perindustrian NIMP dan Dana Pelaburan Bersama Strategik NIMP," katanya berucap melancarkan NIMP 2030 di sini, semalam.

Majlis pelancaran itu berlangsung di Kementerian Pelaburan, Perdagangan dan Industri (MITI), yang juga penggerak NIMP.

Turut hadir, Timbalan Perdana Menteri, Datuk Seri Dr Ahmad Zahid Hamidi serta Menteri MITI, Tengku Datuk Seri Zafrul Abdul Aziz.

Perdana Menteri berkata, NIMP 2030 yang dilancarkan semalam, menetapkan empat misi



Anwar bersama Ahmad Zahid dan Tengku Zafrul melancarkan Pelan Induk Perindustrian Baharu 2030 di Kuala Lumpur, semalam. Turut hadir, Menteri Pengangkutan, Anthony Loke Siew Fook (tiga dari kanan); Menteri Pertanian dan Keterjaminan Makanan, Datuk Seri Mohamad Sabu (dua dari kanan) serta Menteri Komunikasi dan Digital, Fahmi Fadzil (kiri). (Foto Asyraf Hamzah/BH)

bagi memacu transformasi industri di negara ini pada skala besar.

Anwar berkata, misi pertama, untuk memajukan ekonomi, yang mana industri akan digalakkan berinovasi dan menghasilkan produk lebih canggih, sekali gus mampu meningkatkan daya saing negara dalam pasaran global.

Beliau berkata, misi kedua untuk membina sebuah negara berdaya maju dalam teknologi, bagi memacu inovasi, meningkatkan produktiviti serta mencipta peluang baru untuk pertumbuhan ekonomi.

"Misi ketiga untuk mencapai pelepasan sifar bersih. Misi ini menekankan komitmen kami untuk menangani perubahan iklim dengan berusaha untuk masa depan sifar bersih.

"Melalui amalan mampan dan inisiatif hijau, kami menyasar mengurangkan pelepasan karbon dan membina ekonomi berdaya tahan dan mesra alam.



"Misi ini sejajar inisiatif Pelan Hala Tuju Peralihan Tenaga Nasional (NETR) saya lancarkan baru-baru ini," katanya.

Jamin keselamatan ekonomi

Mengulas lanjut Anwar berkata, misi keempat NIMP adalah untuk menjaga keselamatan dan keberangkuman ekonomi.

"Misi ini bertujuan mewujudkan persekitaran yang membolehkan jaminan kepada keselamatan rantaian bekalan, menyokong perusahaan kecil sederhana (PKS) dan menggalakkan penyertaan saksama dalam aktiviti ekonomi di semua negeri," katanya.

Anwar yang juga Menteri Kewangan, berkata NIMP 2030 menggunakan pendekatan berasaskan misi, berbeza dengan

transformasi industri sebelum ini dan tiga pelan induk perindustrian sejak 1986.

"Dalam tempoh tujuh tahun yang singkat, NIMP 2030 mesti mengambil pendekatan transformatif dan pantas untuk mencapai matlamatnya," katanya.

Dalam pada itu, Anwar berkata, rangka kerja NIMP 2030 yang direka untuk meletakkan Malaysia sebagai kuasa ekonomi serantau juga akan memastikan pengalihan kekayaan ekonomi yang adil kepada rakyat.

Katanya, pelan itu juga sebahagian komponen Ekonomi MADANI yang akan menghidupkan semula sektor pembuatan, bagi memastikan negara kekal berdaya saing, di sebalik cabaran dan trend mega yang semakin meningkat.

"NIMP 2030 direka untuk memandu trajektori Malaysia sebagai kuasa global dalam pembangunan industri, melebarkan hubungan domestik bagi mencipta

kekayaan merentasi negara dan mengukuhkan kedudukannya dalam rangkaian nilai global.

"Pelan ini adalah bertepatan untuk mempercepatkan transformasi perindustrian di Malaysia, sejajar dengan usaha merealisasikan visi negara," katanya.

Anwar berkata, kerajaan yakin strategi dalam NIMP 2030 akan membuahkan hasil yang bermakna dan memberi impak besar kepada ekonomi negara.

"Secara khususnya, NIMP 2030 menasar untuk meningkatkan nilai tambah sektor pembuatan kepada RM587.5 bilion menjelang 2030, meningkat sebanyak 6.5 peratus daripada yang hari ini.

"Ini menunjukkan peningkatan sebanyak 61 peratus yang diperolehi intervensi NIMP 2030 untuk sektor berimpak tinggi - elektrik dan elektronik, kimia, kenderaan elektrik, aeroangkasa, farmaseutikal dan bahan maju, seperti mineral dan logam," katanya.